

# D Tüpflichysser 2022

Ja, grüessech wohl, mir sy di Nöie  
Eigentlech ja o di Alte  
Ds erschte Mal sy mir hie live derby

Jitz lähnet zrügg, Dir dörfst chli löie  
Löt Nech hie la unterhalte  
'S fröit is, syt Der üses Vis-à-vis

Zwe wyssi alti Manne mit schwarzer Farb im Gsicht  
Kes \*\_inne hanget dranne, derby wär das hütt doch Pflicht  
Uf ds Tierwohl chunt's is o nid so drufaa  
Dir chönntet jitz no grad ds Lokal verla

Wül ächt, das isch dermasse mies –  
Da bruuchts ganz klar e Warnhiwys

Si wei i däm Ouschtralie der Djokovic nümme ha  
Und gwüss nid wäg Lappalie, dä wird nie meh ynegra  
Es Visum chan er sich o niene chouffe  
Jitz mues er halt de über ds Wasser loufe

Uf Bärndütsch seisch zu som ne Pack  
Nid «Heiland» sondern «Heilandsack»

Ja, d USA sy dusse us däm Afghanistanischtan  
D Chinese und o d Russe häffe gärn de Taliban  
Der Weschte aber setzt uf Gottvertroue  
Wän kümmeret scho ds Lyde vo paar Froue?

Bi all däm mögliche Entsetze  
Muesch halt Prioritäre setze

Es «Rest in Peace» em Bund, er isch quasi fusioniert  
U drum isch's o kes Wunder wird der Titel jitz justiert  
Der «Z» chunt hindedra, so git das «BundZ»  
Und ja, di Zämelegig isch e Brunz

Da chöi mer mache, was mer wei  
'S wird alls Tamedia-Einheitsbrei

Der Musk, dä syg e Stütze, är wird d Person vom Jahr  
Het gschwore, d Mönschheit z schütze und z bewahre vor der Gfahr  
U drum syg's für e Elon Musk e Pflicht:  
Für all im All gält' üb'rall Maskepflicht

U de? Mir hoffe, dass's Nech gfalli  
Alles and're wäri gloge  
D Stimmig schynt is ämu grandios

Doch halt, mir hei no gar nid alli  
Gnüsslech dür e Ggaggo zoge  
Drum chunt hie Teil 2, es geit scho los:

D Frou Merkel, di isch wägg und ABBA wider da  
Der Kurz isch churz spitz wägg und «Wetten dass» isch wider da

Der Trump isch gottlob wägg – doch gly scho wider da  
Der Harry isch chli wägg, der Philip ganz u d Queen no da

Der Nsame isch wägg, u der Aebischer isch wägg,  
u der Martins isch o wägg, u der Hefti isch o wägg,  
u der Spielmann isch o wägg, u der Bürgy isch o wägg,  
u der Fasnacht wider wägg, der Camara isch o wägg,  
der Sulejmani jitz no wägg, u der Meischtertitel wägg  
Doch der Wagner, dä blybt da  
Der Federer isch wägg u glych im Wärbblock no da

O ds Virus isch mal wägg – u plötzlech wider da  
Und leider isch der Schnägg nid wägg u hocket geng no da

Der Endo isch o wägg – u glych geng no chli da  
Bir Fasnacht seit me zägg und wägg u trotdäm isch si da

Ja, alles isch im Wandel ussert d Tories  
Di sötte o mal wägg mit ihrem Boris

I ha ja sälber nüüt gäg Party  
Doch mängisch hulfti's, dass me warti

Der Putin rüschtet uuf u d Wält, di luegt mal zue  
Är schiesst Raggete druuf u het mit däm no lang nid gnuet  
'S isch wider Chrieg z Europa – eifach chrank  
Das git ke Pointe für ne Schnitzelbank

Dä tröimt vo Zyte vo de Zare  
U macht druus Zyte vo Barbare

Der Markus Somm, dä het doch der Näbelspalter ghouft  
Jitz het er gseit, är wett doch, dass me dä chli anders touft  
E nöije Name passt zum nöije Gstalter  
Ganz unvernäblet heisst's jitz «Landesspalter»

So chan er mit em Rima fyre  
Dass öppis Rächts wärd us Satire

Sogar der Rocker «Gölä», dä passt hie o no dry  
Är schefflet wacker Chöle und wett glych e Büezer sy  
Doch öppis chan i eifach nid verstah:  
Wi hätt dä nume «no vil blöder ta»?

Wär trotdäm fingt, di Platte chouff' er  
Dä chunt vom Räge no i Trouffer

Ja, d Ehe gilt für alli, das hei mer chürzlech glehrt  
Me gloubt, dass's allne gfalli, 's syg doch würklech nid verchert  
O d SVP fingt, 's sygi beschtens grate  
Wül ändlech chönn der Fuchs der Hess hürate

Und nöi chöi si bim Sich-Vermähle  
O beidi ds Gschlächht no sälber wähle

So, das wär's o gsy mit Lache  
D Tüpflichysser heit der gnosse  
Schön, syt Dir hütt alli härecho

U wül mer's hüür uf Schmalspur mache  
Sy mer felsefesch entschlosse:  
Ds nächscht Jahr wider richtig – öppe scho!

